

## Malaysia Punya Potensi Besar Sebagai Negara Maritim

Terakhir dikemaskini: Selasa, 17 Disember 2019 16:41 | [Cetak](#) | Jumlah paparan: 58

Kongsi 0

Syorkan 0

Kongsi

Tweet

Share



**SELASA, 17  
DISEMBER**  
– Negara  
Malaysia  
mempunyai  
potensi besar  
sebagai  
sebuah  
negara  
maritim dari  
aspek

perkembangan ekonomi, sosial dan keselamatan negara.

Mantan Panglima Tentera Laut Diraja Malaysia (TLDM), Laksamana (Bersara) Tan Sri Dato' Seri Panglima Dr. Ahmad Kamarulzaman Hj Ahmad Badaruddin yang juga merupakan Profesor Adjung bagi Fakulti Perniagaan, Ekonomi dan Perakaunan berkata, dengan keluasan kawasan maritim Malaysia iaitu 556,285 kilometer persegi, industri seperti hidrokarbon, perikanan, pelancongan, perdagangan dan sumber mineral mampu mendapat manfaat besar.

“Sejarah Kesultanan Melayu Melaka juga telah memberi gambaran bahawa Melaka pada kurun ke-14 merupakan satu kuasa maritim berpengaruh pada zaman tersebut.

“Kedudukan sempadan maritim Malaysia yang bersempadan dengan enam buah negara di rantau Asia Tenggara juga menjadikan negara ini amat strategik dalam pelbagai industri khususnya perdagangan,” katanya.

Beliau berkata demikian dalam satu syarahan perdana bertajuk “Geopolitik dan Impak Terhadap Pembangunan Ekonomi: Malaysia Sebuah Negara Maritim” yang berlangsung di Auditorium Fakulti Perubatan dan Sains Kesihatan (FPSK) UMS baru-baru ini.

Menurut beliau lagi, industri perikanan umpamanya mampu menjana sumber pendapatan sehingga RM10 bilion setahun, sementara sumber minyak dan gas mampu menjana sehingga RM241 bilion, menjadikan kawasan maritim Malaysia sebagai satu potensi memacu ekonomi negara.

“Namun, ancaman-ancaman maritim seperti pencemaran laut, rompakan laut, penculikan oleh kumpulan pengganas, pencerobohan nelayan asing yang menangkap ikan di kawasan negara merupakan antara cabaran yang perlu diberi perhatian,” katanya.

Walau bagaimanapun, katanya dengan menggiatkan lagi kerjasama dua hala antara negara berkaitan, cabaran-cabaran tersebut mampu dijadikan satu peluang besar buat negara untuk meraih pelbagai manfaat dalam aspek pembangunan ekonomi negara.

Lebih 300 pelajar UMS dari pelbagai fakulti hadir pada syarahan perdana tersebut.

Terdahulu, Dato’ Seri Panglima Dr. Ahmad Kamarulzaman juga telah menyampaikan satu ceramah dalam sesi perkongsian bertajuk “Be Inspired” bersama pelajar UMS pada sesi pagi, yang menyentuh berkaitan keperluan para generasi muda untuk berfikir di luar kotak pemikiran dan mensyukuri keadaan dan persekitaran negara Malaysia yang aman dan harmoni.